

**Namminersorlutik Oqartussat kommunillu
inissiaataannik attar-tortittakkanik inissiatut
imaluunniit illutut nammineq pigisatut tiguisarneq
pillugu Inatsisartut peqqussutaata
allanngortinneqarneranik Inatsisartut inatsisaat
(Ilulissani, Aasianni, Sisimiuni, Nuummi aamma
Qaqortumi Namminersorlutik Oqartussat
ilaqutariinnut ataasiakkaanut illuutaannik aamma
illuutaannik affarleriinnik ilaatitsinnginneq kiisalu
tamakkiisumik akiliuteqarluni tiguisinnaanissamut
periarfissaq)**

§ 1

Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaanni nr. 12, 19. november 2007-imeersumi ima allannguisoqassaaq:

1. § 3, imm. 1-imi nr. 8-p kingornagut ikkunneqassaaq:

“ 9) Ilulissani, Aasianni, Sisimiuni, Nuummi aamma Qaqortumi ilaqutariinnut ataasiakkaanut illut aamma illut affarleriit.”

2. § 14-ip kingornani immikkoortumi *”Pisortanit taarsigassarsiat, qularnaveeqqusiineq akiligassanngortitsisarnerlu”* § 14a ikkunneqarpoq:

“ **§ 14a.** Namminersorlutik Oqartussat kommunillu inissiaataanni ilaqutariinnut ataasiakkaanut illut aamma illut affarleriit attartortittagai, Namminersorlutik Oqartussanit imaluunniit kommuninit pigineqartut, 275.000 kr-nillu ataallugit niueqatigiinnikkut akeqartinneqartumi, qinnuteqartoqarneratigut niueqatigiinnermi akigititaasup tamakkiisumik akiliuteqarnikkut imaluunniit akilersuinissamut isumaqatigiissusiortoqarneratigut tiguneqarsinnaavoq, tak. imm. 2. Qinnuteqaat Naalakkersuisunut kommunalbestyrelsimulluunniit nassiunneqassaaq pisiarinissaanullu aningaaserivimmiit pituttuisuunngitsumik nalunaarummik ilaqartinneqassalluni, tassani aningaaseriviup inissiap pisiarinissaanut akissaqartinnneqarnera nalunaarutigissavaa.

Imm. 2. Attartortup annerpaamik 275.000 koruunit tamakkerlugu akigititaq akilersinnaanngippagu, illuummik pisinermi naafferarlugit akilersuinissamut isumaqatigiissusiortoqarsinnaavoq. Naafferaalluni

akilersuinnermut aaqqissuussineq amerlanerpaamik qaammatit 60-it sinnerlugit ingerlasinnaassanngilaq, annikinnerpaamillu qaammammut 4.000 koruuninik naafferaalluni akilersuisoqartassalluni. Akiliummut ernialersuisoqaranilu akitsuusersuisoqassanngilaq.

Imm. 3. Imm. 2 naapertorlugu naafferaalluni akilersuinnermut aaqqissuussinnermik eqquutsitsisoqarsinnaanngippat, ukiumoortumik 3 %-imik ernialerlugit nationalbankip erniaritittagai ilanngullugit naatsorsuisoqartassaaq. Erniarititat akiligassap sinneranut naatsorsorneqartassaaq qaammammut akilersorneqartartussamik.

Imm. 4. Imm. 1-2 naapertorlugit pisinnermi peqqussummi § 11, imm. 2-4 aamma §§ 13-16 atuutinngillat.”

§ 2

Inatsisartut inatsisaat 1. januar 2018-imi atuutilissaaq.

Namminersorlutik Oqartussat, ulloq 17. november 2017

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut